



PATNUBAY SA MISA

19 Setyembre 2021

Ika-25 Linggo sa Karaniwang Panahon

Taon B

ANG PINAKAMABUTING LINGKOD NG LAHAT

Ang hangarin na magtamo ng pinakamagandang resulta at ang mas pagbutihan pa ang paggawa, ay likas ng naguudyok sa mga tao upang umunlad. Ngunit karaniwang ito'y dahil sa pagmamataas – pagmamataas na nagiging dahilan upang tapakan natin ang iba matamo lamang ang tagumpay. Hindi gayon ang itinuro sa atin ni Hesus.

Sa Ebanghelyo, hinahamon ni Hesus ang kanyang mga disipulo na maging lingkod ng lahat. Iyon ang pinakapraktikal at mabisang paraan ng pagsugpo sa pinsalang bunga ng “mga nagkakalabang pagnanasa sa ating kalooban.” (Sangguniin ang Ikalawang Pagbasa ngayon.)

Sa Eukaristiyang ito, idalangin natin sa Panginoon ang biyayang makapaglingkod, dahil sa pagmamahal at nang may pagmamahal. At sa huling linggo ng Buwan ng Katekesis, ipagdasal natin ang lahat ng katekista para di lamang nila ituro kundi isabuhay rin ang pananampalataya.



PASIMULA



Pambungad

(Ipahahayag lamang kung walang awiting nakahanda.)

Sabi ng Poong Maykapal, “Ako ang s’yang kaligtasan ng hirang kong sambayanang tinutugon ko sa dasal na sagipin sa kaaway.”

Pagbati

P–Pagpalain si Hesus, ang Lingkod ng Ama at ng sangkatauhan. Ang kanyang biyaya at kapayapaan ay sumainyong lahat!

B–At sumaiyo rin!

Pagsisisi

P–Sa paghahanda natin para sa pagdiriwang ng mga Banal na Misteryo, pagnilayan natin ang ating pagiging di karapat-dapat dito. (Manahimik saglit.)

P–Naparito ka para mapagbalik-loob ang mga makasalanan. Panginoon, kaawaan mo kami!

B–Panginoon, kaawaan mo kami!

P–Inialay mo ang iyong buhay para sa kaligtasan ng mundo. Kristo, kaawaan mo kami!

B–Kristo, kaawaan mo kami!

P–Ipinananalangin mo kami sa kanan ng Ama. Panginoon, kaawaan mo kami!

B–Panginoon, kaawaan mo kami!

P–Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B–Amen!

Papuri

B–Papuri sa Diyos sa kaitaasan at sa lupa’y kapayapaan sa mga

taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

This issue of *Patnubay sa Misa* may be downloaded for free anywhere in the world. A “love offering” for the continuation of our apostolate will be appreciated. Please, send your donation to “Word & Life Publications.” Our Savings Account is BPI – # 3711-0028-46. Send us a copy of the deposit slip with your name and (email) address for proper acknowledgment. Thank You!

Panalanging Pambungad

P –Ama naming makapangyarihan, itinakda mong ang lahat ng mga utos mo ay mauwi sa pag-ibig sa iyo at sa kapwa tao. Ipagkaloob mong sa pagtalima namin sa mga ito, kami’y pagindapatin mong sumapit sa buhay na walang katapusan sa pamamagitan ni Hesukristo kasama ng Espiritu Santo magpasawalang hanggan.
B –Amen!

PAGPAPAHAYAG NG SALITA NG DIYOS



Unang Pagbasa Kar 2:12.17-20

Dulot ng siping ito buhat sa Aklat ng Karunungan ang mga plano ng masasamang tao laban sa isang tipikal na tapat na Judio na humihimok sa kanilang talikuran ang kanilang masamang pamumuhay. Ang biktima ng kanilang masasamang plano ay kumakatawan kay Hesus, na siyang sadyang pinakatapat sa lahat.

L– Pagpapahayag mula sa Aklat ng Karunungan

Sinabi ng mga masasamang tao: “Tambangan natin ang mga katong matuwid, pagkat hadlang sila sa ating mga balak; ipinamumukha nila sa atin ang pagsuway sa kautusan, at sinasabing tayo’y nagkasala laban sa kaugalian.

Tingnan natin kung ang salita nila’y magkakatotoo, kung ano ang mangyayari sa kanila pagkamatay nila. Kung ang mga matuwid ay anak nga ng Diyos, sila ay tutulungan niya at ililigtas sa mga kaaway.

Subukin natin silang dustain at pahirapan, upang malaman natin kung hanggang saan ang kanilang kagandahang-asal, at kung hanggang kailan sila makatatagal. Subukin nating ibingit sila sa kamatayan, yamang ang sabi nila ay iingatan sila ng Diyos.”

Ang Salita ng Diyos!
B –Salamat sa Diyos!

Salmong Tugunan Awit 53

B –*Ang D’yos ang s’yang tumutulong at sa aki’y nagtatanggol!*

R. M. Velez

Eb Fm Eb/G Cm

Ang D’yos ang s’yang tumu-tu-long

Ab Bb7 Eb

at sa a-ki'y nagtatang-goll!

* **Makapangyarihang Diyos, ako ay iligtas, ipagsanggalang mo niyong iyong lakas; dinggin mo, O Diyos, itong iyong anak, sa aking dalangin ngayo’y binibigkas.** **B.**

* **Ang nagmamataas ay laban sa akin. Hangad ng malupit ang ako’y patayin. Sila’y mga taong ang Diyos ay di pansin.** **B.**

* **Batid kong ang Diyos ang aking katulong, tagapagsanggalang ko ang Panginoon. Buong galak naman akong maghahandog ng pasasalamat sa Panginoong Diyos, dahilan sa kanyang mabuting kaloob.** **B.**

Ikalawang Pagbasa San 3:16-4:3

Sa pamayanang binabagabag ng selos at makasariling ambisyon, mungkahi ni Santiago ay isang solusyon: maghangad ng karunungan sa itaas at masiglang itaguyod ang kapayapaan.

L– Pagpapahayag mula sa Sulat ni Apostol Santiago

Mga kapatid, saanman naghahari ang inggit at makasariling hangarin, maghahari rin doon ang kaguluhan at lahat ng uri ng masamang gawa.

Ngunit ang may karunungan mula sa Diyos, una sa lahat, ay may malinis na pamumuhay. Siya’y maibigin sa kapayapaan, mahinahon, mapagbigay, mahabagin, at masipag sa paggawa ng mabuti, hindi nagtangi at hindi nagkukunwari. At namumunga ng katwiran ang binhi ng kapayapaang inihahasik ng taong maibigin sa kapayapaan.

Ano ang pinagmumulan ng inyong alitan at paglalaban-laban? Hindi ba’t ang masasamang nasa na namumugad sa kalooban ng bawat isa sa inyo, at pawang nagkabalaban-laban? Mayroon kayong pinakamimithi ngunit hindi ninyo makamtan, kaya’t papatay kayo kung kailangan, mapasainyo lamang ito. Dahil sa inyong pag-iimbot sa mga bagay na hindi inyo, kayo’y nagkagalit at naglalaban-laban. Hindi ninyo nakakamtan ang inyong minimithi, sapagkat hindi kayo humihingi sa Diyos. At humingi man kayo, wala rin kayong natatanggag, sapagkat

masama ang inyong layunin – humihingi kayo upang gamitin sa kalayawan.

Ang Salita ng Diyos!
B –Salamat sa Diyos!

Aleluya

B –**Aleluya! Aleluya!**
Tayo’y tinawag ng Diyos upang magingning na lubos sa aral ni Kristo Hesus.
Aleluya! Aleluya!

Mabuting Balita Mc 9:30-37

Ang kababaang-loob at paglilingkod ay ang dalawang katangiang mahirap tupdin ng mga apostol. Pinagtibay ni Hesus ang kanyang pangaral tungkol dito sa pamamagitan ng paghihikayat sa kanila na maging lingkod ng lahat.

P–Ang Mabuting Balita ng Panginoon ayon kay San Marcos

B –**Papuri sa iyo, Panginoon!**

Noong panahong iyon, si Hesus at ang kanyang mga alagad ay nagdaan sa Galilea. Ayaw ni Hesus na malaman ito ng mga tao, sapagkat tinuturuan niya ang kanyang mga alagad. Sinabi niya: “Ang Anak ng Tao ay ipagkakanulo at papatayin, ngunit muling mabubuhay sa ikatlong araw.” Hindi nila naunawaan ang sinabi niya, ngunit natatakot naman silang magtanong sa kanya.

At dumating sila sa Capernaum. Nang sila’y nasa bahay na, tinanong ni Hesus ang kanyang mga alagad, “Ano ba’ng pinagtatalunan ninyo sa daan?” Hindi sila kumibo, sapagkat ang pinagtatalunan nila’y kung sino sa kanila ang pinakadakilang. Naupo si Hesus, tinawag ang Labindalawa at sinabi, “Ang sinumang nagnanais maging una ay dapat maging huli sa lahat, at maging lingkod ng lahat.”

Tinawag niya ang isang maliit na bata, at pinatayo sa harapan nila. Pagkatapos, kinalong niya ito at sinabi, “Ang sinumang tumanggap sa isang maliit na batang tulad nito alang-alang sa akin ay tumatanggap sa akin; at sinumang tumanggap sa akin – hindi ako ang kanyang tinatanggap kundi ang nagsugo sa akin.”

Ang Mabuting Balita ng Panginoon!

B –**Pinupuri ka namin, Panginoon Hesukristo!**

Homiliya

Sumasampalataya

B—Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P—Nananalig sa kabaitan ng Diyos sa mga dumudulog sa Kanya, tayo'y pakumbabang magharap ng ating mga kahilingan para sa lahat ng nangangailangan. Manalangin tayo:

B—**Bukal ng lahat ng kasiyahan, dinggin Mo kami!**

* Para sa buong Simbahan, at lalo sa mga pamayanang Kristiyano na hinahamak o pinag-uusig: Nawa maging bukal ng kanilang lakas ang pag-asa sa gantimpalang walang hanggan. Manalangin tayo! **B.**

* Para sa Santo Papa at lahat ng iba pangmga Espirituwal na pinuno ng Simbahan: Nawa pahalagahan nila ang kababaang-loob at ang diwa ng paglilingkod sa pagtulad kay Hesus, na siyang Lingkod ng lahat. Manalangin tayo! **B.**

* Para sa mga laikong kaanib ng Simbahan na bumubuo sa 99% ng mananampalataya: Nawa sila ay makatalos sa kanilang karangalan at tumupad sa tungkulin nilang maging mga tagapagtatag ng kaharian sa ating lipunan. Manalangin tayo! **B.**

* Para sa mga kumakalinga sa mga batang palaboy, may kapansanan, at lulong sa droga: Nawa masigasig nilang maipagpatuloy ang paglilingkod kay Kristo sa kanilang kapwa. Manalangin tayo! **B.**

* Para sa ating lahat: Nawa maiwaksi natin ang pagkainggit, pagkaganid, at pagkamakasarihi na siyang sanhi ng ating pagkakahati-hati, at mapalitan ito ng kabutihan, pagbibigayan, at malasakit sa kapwa. Manalangin tayo! **B.**

* Tahimik nating ipanalangin ang ating mga pansariling kahilingan. (*Tumigil saglit.*)

Manalangin tayo! **B.**

P—Panginoong Hesus, pagkaloo-ban mo kami ng kababaang-loob at paglilingkod nang kami'y maging mga kasangkapan ng iyong pagmamahal sa lahat ng aming mga kapatid, lalo na sa mga nagdurusa. Ikaw na nagpakasakit at patuloy na kumakalinga nang walang hanggan.

B—Amen!



P—Manalangin kayo . . .

B—Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P—Ama naming Lumikha, mawain mong kalugdan ang mga alay ng iyong sambayanan upang ang ipinahahayag namin nang may pananampalatayang matibay ay aming tanggapin sa banal na pakikinabang sa pamamagitan ni Hesukristo kasama ng Espiritu Santo magpasawalang hanggan.

B—Amen!

Prepasyo II

P—Ama naming makapangyarihan, tunay ngang marapat na ikaw ay aming pasalamatan sa pamamagitan ni Hesukristo na aming Panginoon.

Lubhang nabagbag ang kanyang loob sa pagkakamali ng tao sa sansinukob, kaya't minabuti niyang siya'y ipanganak ng Bir-

heng bukod mong pinagpala sa babaing lahat. Sa labi ng imbing kamatayan kami ay inagaw ng namatay mong Anak. Sa pagkabuhay niya, kami'y kanyang binuhay upang kaugnayan namin sa iyo'y huwag magwakas.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B—**Santo, santo, santo Panginoong Diyos ng mga hukbo. Napupuno ang langit at lupa ng kadakilaan mo. Osana sa kaitaasan!**

Pinagpala ang naparirito sa ngalan ng Panginoon. Osana sa kaitaasan!

Pagbubunyi

B—**Sa krus mo at pagkabuhay kami'y natubos mong tunay, Poong Hesus naming mahal, iligtas mo kaming tanan ngayon at magpakailanman.**



B—Ama namin . . .

P—Hinihiling namin . . .

B—**Sapagkat iyo ang kaharian at ang kapangyarihan at ang kapurihan magpakailanman! Amen!**

Paanyaya sa Kapayapaan Paghahati-hati sa Tinapay

B—**Kordero ng Diyos na nag-aalis ng mga kasalanan ng sanlibutan, maawa ka sa amin. (2x)**

Kordero ng Diyos na nag-aalis ng mga kasalanan ng sanlibutan, ipagkaloo mo sa amin ang kapayapaan.

Paanyaya sa Pakikinabang

P—Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B—**Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.**

Antipona ng Pakikinabang

(*Ipahahayag lamang kung walang awiting nakahanda.*)

Binigay mong mga utos para sundin nang malugod, kaya't iyong itaguyod landas ng puso ko't loob nang utos mo ay masunod.

Panalangin Pagkapakinabang

P –Ama naming mapagmahal, kaming pinapagsalo mo sa banal na pakikinabang ay patuloy mong kaawaan at tulungan upang ang aming tinanggap ay siya nawang umiral sa pamumuhay namin sa araw-araw bunga ng iyong pagtubos na aming ipinagdiriwang sa pamamagitan ni Hesuskristo kasama ng Espiritu Santo magpasawalang hanggan.

B –Amen!



P –Sumainyo ang Panginoon!

B –At sumaiyo rin!

P –Magsiyuko kayo at ipanalangin ang pagpapala ng Diyos. (*Manahimik saglit.*)

–Iligtas nawa kayo ng makapangyarihang Diyos sa lahat ng masama at pagpalain kayo ng bawat mabuting kaloob.

B –Amen!

P –Manunton nawa kayo sa Kanyang mga halimbawa, palaging gumagawa ng tama at mabuti, hanggang marating ninyo ang inyong makalangit na kamanahan.

B –Amen!

P –Pagkalooban Niya nawa kayo ng lakas para sa mga pagsubok

at tulutan kayong maging mahabagin sa mga nagdurusa.

B –Amen!

P –Pagpalain nawa kayo ng makapangyarihang Diyos: Ama, Anak, at Espiritu Santo.

B –Amen!

P –Humayo kayo upang mahalín at paglingkuran ang Panginoon sa inyong kapwa.

B –Salamat sa Diyos!

Tune in to **Bisperas sa Veritas** on **Radio Veritas (846 kHz)** every **Saturday** from **5:00 to 6:00 p.m.** and feel a part of the interactive radio program that helps you discover:

- the message of each Sunday's theme and Biblical readings, and
- how it can empower your life, your family, and your community.

Si Hesus, ang Ulirang Pinuno at Tagapagligtas

Jess P. Balon • Isinalin ni Cecilia G. Valmonte, EdD

Ang hangaring makaangat sa iba ay malalim na nakaugat sa puso ng tao. Ito ay karaniwang dahil sa pagmamataas at malimit na nagtatagumpay ang diyablo na palakihin ito hanggang sa maging kapalaluan, karahasan, at pang-aapi.

Ang mga alagad ay hindi lusot sa ganitong hilig na makasalan. Bahagi ng Mabuting Balita ngayon at iba pang mga katulad na sipi (*sangguniin Mc 9:34, Mt 20:20-24 at Lu 22:24*) ang pagsiwalat sa likas nilang kahinaan, na isa ring palaisipan tulad ng sa atin, na may makamundong ambisyon, kakitiran ng pag-iisip, at pagkainggit.

Tinulungan sila ni Hesus na iwaksi ang kanilang paghangad sa kapangyarihan sa pamamagitan ng kanyang halimbawa at pangangal. (*Liban sa t. 35 ng Mabuting Balita ngayon, sangguniin din ang Jn 13:3-5, 12-17 at Mc 9:35.*) Maliban kay Judas, lahat sila ay unti-unting tinablan ng kanyang pangalal at tuluyang naging buhay na huwaran ng pagpapakumbaba sa kanilang mga pamayanan sa paraan nila ng pamumuno.

Sa pagpapahayag niyang siya

ay **“naparito upang maglingkod hindi upang paglingkuran”** (*Mt 20:28*), **pinasimulan ni Hesus ang “Kilusan ng Paglilingkod” bilang bagong paraan ng pagiging pinuno sa pamayanan.** Isang bagong “kilusan” na may ganitong kasabihan – “Ako ay magiging isang lingkod!” **Paglilingkod na may pag-ibig at dahil sa pag-ibig ang dapat na maging katangian ng mga alagad ng “Lingkod ng Panginoon at ng lahat ng tao.”** Ang ganitong oryentasyon ay **nakaugat sa kababaang-loob at pinalalago ng pagiging bukas-palad at pagmamahal.**

Nasa ating mga Kristiyano na patunayang ito’y hindi lamang isang magandang teoriya. Dapat nating ipakita sa gawa na **ang kahandaang maglingkod ay hindi pagpapalipin.** Ang pakum-babang paglilingkod ay hindi isang di-maiwasang kapalaran ng mga mangmang at mga taong di biniyayaan ng kakayahang mamuno. Ang Kristiyanong paglilingkod ay para sa may tapang at kakayanan. Ito ay para sa mga naghahangad na maging dakila sa Kaharian ng Diyos. Tulad ng turo sa atin

ni Hesus, **ang pakumbabang paglilingkod ay tanda ng tunay at pagmatagalang kadakilaan.**

Ang lahat ng ito ay may katumbas na halaga. Hindi pahintulutan ng diyablo ang hamon ng tapat na kababaang-loob. Kinalaban niya ang “Lingkod ng Panginoon” sa disyerto, at natalo. (*Sangguniin Lu 4:13.*) Nang inilunsad niya ang kanyang huling pakikipaglaban sa Getsemane at sa Kalbaryo, siya ay muli ring tinalo ni Hesus, **pagkat sa krus ang kanyang misyong paglilingkod lahat ay natupad sa rurok.** (*Sangguniin Mt 20:28.*) Ngayon naman ay sinusubukang gumanti sa atin ng diyablo. Hindi ito magiging maddaling laban para sa atin, ngunit si Hesus, ang tagumpay na lingkod ay hindi tayo iiwang mag isa.

Ngunit **kung lalaban tayong kasama si Kristo, mananalò tayong kasama niya,** dahil hindi iiwan ng Panginoon na walang gantimpala ang mga pagsisi-kap na maging lingkod na tulad niya. Para sa kanya, tinatawag na **Muling Pagkabuhay at Pagakyat sa Langit** ang gantimpala (*sangguniin Heb 12:2*); isa itong pagkakataon upang makapasok sa langit, ang tahanan ng mga Santo, ng mga abang lingkod ng Diyos.



WORD & LIFE PUBLICATIONS

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 8894-5401; 8894-5241; 8475-8945 • Website: www.wordandlife.org

• E-mail: marketing@wordandlife.org; wordandlifepublications@gmail.com • FB: Word & Life Publications

• Editorial Team: Fr. S. Putzu, Valmonte, J. Domingo, M. Vibiesca, V. David, R. Molomog, D. Daguio

• Illustrations: A. Sarmiento, B. Cleofe • Marketing: J. Feliciano • Circulation: R. Saldua